

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

ODLUKU
O GRUPNOM IZUZEĆU SPORAZUMA O PRENOSU TEHNOLOGIJE,
LICENCI I *KNOW HOW*

Sarajevo
Decembar, 2005. godine

Na osnovu člana 25. tačka a) i člana 7. stav (1) tačka c) Zakona o konkurenciji (»Službeni glasnik BiH«, broj 48/05), Konkurencijsko vijeće na 20. sjednici održanoj 27.12.2005. godine, je donijelo

**ODLUKU
O GRUPNOM IZUZEĆU SPORAZUMA O PRENOSU TEHNOLOGIJE,
LICENCI I *KNOW HOW***

I. OPĆE ODREDBE

**Član 1.
(Predmet Odluke)**

Ovom Odlukom se propisuju uslovi za grupno izuzeće sporazuma o prenosu tehnologije, određuju se uslovi koje sporazumi moraju sadržavati, ograničenja ili uslovi koje takvi sporazumi ne smiju sadržavati, te drugi uslovi koji se moraju ispuniti za grupno izuzeće tih sporazuma od primjene odredbi o zabranjenim sporazumima iz Zakona o konkurenciji (u daljnjem tekstu: Zakon).

**Član 2.
(Sporazumi na koje se primjenjuje grupno izuzeće)**

- (1) Grupna izuzeća primjenjuju se na sporazume o prenosu tehnologije iz člana 7. stav (1) tačka c) Zakona sklopljene između dva privredna subjekta kojima se ugovara proizvodnja proizvoda koji je predmet sporazuma, uključujući i sporazume u kojima se uz proizvodnju ugovara više od jednog nivoa trgovine.
- (2) Pod sporazumom o prenosu tehnologije iz stava (1) ovoga člana smatra se sporazumi o odobravanju patenata, sporazum o odobravanju licence za tehnološko znanje i iskustvo (*know-how*), sporazum o odobravanju licence za autorska prava na računarski program ili kombinovani sporazum o odobravanju licence za patente, tehnološka znanja i iskustva (*know-how*) ili autorska prava na računarski program, uključujući i svaki drugi sporazum koji sadrži odredbe u vezi s prodajom i kupovinom proizvoda, ili odredbe koje se odnose na odobravanje licence za druga prava intelektualnog vlasništva, kao i na ustupanje prava intelektualnog vlasništva, pod uslovom da te odredbe ne predstavljaju primarni cilj takvih sporazuma te da su direktno povezane s proizvodnjom predmeta sporazuma.
- (3) Pod sporazumom o prenosu tehnologije iz stava (1) ovog člana smatra se i sporazum o ustupanju patenata, tehnološkog znanja i iskustva (*know-how*), autorskog prava programske opreme ili kombinacije navedenog, u slučaju kada dio rizika u vezi s iskorištavanjem tehnologije sa licencom i dalje snosi ustupatelj, a naročito kada je iznos koji se plaća za ustupanje tehnologije zavisi od prihoda ostvarenog od strane sticatelja proizvodnjom proizvoda na osnovu ustupljene tehnologije, količine tako proizvedenih proizvoda ili broja aktivnosti u kojima je korištena ta tehnologija.
- (4) Tehnološkim znanjem i iskustvom (u daljnjem tekstu: *know how*), u smislu stavova (1) i (2) ovog člana, smatra se skup nepatentiranih praktičnih informacija proistekao iz iskustva i provjere, koji je tajan, značajan i prepoznatljiv. Tajan podrazumijeva da *know-how* kao cjelina ili precizna konfiguracija i spoj svojih dijelova nije opće poznat i lako dostupan. Značajan podrazumijeva da *know-how* obuhvata podatke, odnosno informacije koje su neophodne i korisne za proizvodnju proizvoda koji su predmet sporazuma. Prepoznatljiv podrazumijeva da *know-how* mora biti opisan na dovoljno razumljiv način, kako bi bilo moguće provjeriti ispunjava li kriterije tajnosti i značajnosti.
- (5) Prava intelektualnog vlasništva, u smislu stava (2) ovog člana, su prava industrijskog vlasništva, *know-how*, autorska prava i srodna prava.
- (6) Pod patentima, u smislu stavova (2) i (3) ovog člana, podrazumijevaju se patentni, zahtjevi za priznanje patenata, konsenzualni patentni, zahtjevi za priznanje konsenzualnih patenata, industrijski dizajn, topografije poluvodičkih proizvoda, potvrde o dodatnoj zaštiti za medicinske proizvode ili ostale proizvode za koje se mogu dobiti potvrde o dodatnoj zaštiti i potvrda o pravima uzgajivača bilja.

- (7) Proizvod koji je predmet sporazuma ili ugovorni proizvod iz stava (1) ovog člana je proizvod koji je proizveden primjenom tehnologije sa licencom i /ili proizvod u koji je ta tehnologija ugrađena.
- (8) Privrednim subjektima- stranama u sporazumu , odnosno davateljem i sticateljem licence iz stava (1) ovoga člana, smatraju se i njihovi povezani privredni subjekti.

Član 3.
(Sporazumi na koje se ne primjenjuje grupno izuzeće)

Ne mogu biti izuzeti od zabrane na osnovu grupnog izuzeća prema odredbama ove Odluke:

- a) sporazumi o prenosu tehnologije koji ne ispunjavaju kumulativne uslove propisane članom 8. Zakona i koji nisu usklađeni s ovom Odlukom,
- b) sporazumi o prenosu tehnologije uređeni drugim propisima u skladu sa odredbama člana 7. Zakona.

II. USLOVI KOJE SPORAZUM MORA SADRŽAVATI I OSTALI USLOVI KOJI SE MORAJU ISPUNITI

Član 4.
(Tržišni udio)

- (1) Grupno izuzeće za sporazume iz člana 2. ove Odluke primjenjuje se pod uslovom da ukupan tržišni udio strana u sporazumu na utvrđenom relevantnom tržištu tehnologije i relevantnom tržištu proizvoda nije veći od dvadeset posto (20 %) u slučaju da je riječ o sporazumu sklopljenom između tržišnih konkurenata.
- (2) Grupno izuzeće za sporazume iz člana 2. ove Odluke primjenjuje se pod uslovom da tržišni udio svake strane u sporazumu na utvrđenom relevantnom tržištu tehnologije i relevantnom tržištu proizvoda nije veći od trideset posto (30 %) u slučaju da je riječ o sporazumu sklopljenom između privrednih subjekata koji nisu tržišni konkurenti.
- (3) Tržišni udio strana u sporazumu na relevantnom tržištu tehnologije, u smislu stavova (1) i (2) ovog člana, utvrđuje se kao zastupljenost te tehnologije sa licencom na relevantnom tržištu proizvoda.
- (4) Privredni subjekti se smatraju stvarnim tržišnim konkurentima na relevantnom tržištu tehnologija, u smislu stava (1) ovog člana, ako su konkurenti na relevantnom tržištu tehnologija ustupajući licence za zamjenjive tehnologije i pri tome ne krše prava intelektualnog vlasništva drugih privrednih subjekata.
- (5) Privredni subjekti se smatraju stvarnim tržišnim konkurentima na relevantnom tržištu proizvoda, u smislu stava (1) ovog člana, ako su oba aktivna na tom tržištu, u proizvodnom i geografskom smislu, na kojem se prodaju proizvodi koji su predmet sporazuma i pri tom ne krše međusobno prava intelektualnog vlasništva.
- (6) Potencijalni tržišni konkurenti na relevantnom tržištu tehnologija i relevantnom tržištu proizvoda, u smislu stava (1) ovog člana, su privredni subjekti koji bi u razumnom roku mogli preduzeti dodatna ulaganja ili druge potrebne promjene strukture troškova nužne za pristup tom relevantnom tržištu, kao odgovor na malo, ali stalno povećanje cijena, pod uslovom da pri tom ne krše međusobno prava intelektualnog vlasništva.

Član 5.
(Obračun tržišnog udjela)

- (1) Tržišni udio za strane u sporazumu o prenosu tehnologije iz člana 4. ove Odluke izračunava se na osnovu vrijednosti prodatih proizvoda koji su predmet sporazuma i njihovih zamjenskih proizvoda. Ako podaci o vrijednosti prodatih proizvoda koji su predmet sporazuma i njihovih zamjenskih proizvoda na relevantnom tržištu nisu dostupni, u svrhu određivanja tržišnog udjela strana u sporazumu mogu se primjeniti procjene koje se zasnivaju na drugim pouzdanim tržišnim podacima,

uključujući količinu prodatih proizvoda koji su predmet sporazuma i njihovih zamjenskih proizvoda na relevantnom tržištu.

- (2) Tržišni udio iz stava (1) ovog člana izračunava se na osnovu podataka koji se odnose na kalendarsku godinu koja prethodi sklapanju sporazuma.
- (3) U tržišni udio iz stava (1) ovog člana dodaje se i tržišni udio povezanih privrednih subjekata sa stranama u sporazumu ostvaren na način utvrđen stavovima(1), i (2) ovog člana.
- (4) U tržišni udio davatelja licence na relevantnom tržištu tehnologija, u smislu stava (1), (2) i (3) ovog člana, dodaje se i tržišni udjeli svih njegovih sticatelja licence izračunati na osnovu podataka o vrijednosti prodatih proizvoda u koje je ugrađena tehnologije sa licencom na svakom relevantnom tržištu posebno. Kad su strane u sporazumu tržišni konkurenti na relevantnom tržištu tehnologija, za potrebe izračunavanja tržišnog udjela sticatelja licence, podacima o vrijednosti prodatih proizvoda u koje je ugrađena tehnologija sa licencom pribrajaju se i podaci o vrijednosti prodatih proizvoda u koje je ugrađena vlastita tehnologija sticatelja licence. U slučaju uvođenja novih tehnologija koje se ugrađuju u nove proizvode koji prethodno nisu bili prodavani na tržištu smatrat će se da strane u sporazumu nemaju tržišni udio na relevantnom tržištu tehnologija sve dok stvarno ne započne prodaja novih proizvoda.
- (5) U tržišni udio obje strane u sporazumu na relevantnom tržištu proizvoda, u smislu stavova (1), (2) i (3) ovog člana, ne uzimaju se u obzir podaci o vrijednosti prodatih proizvoda drugih sticatelja licence koji nisu strane tog sporazuma. U tržišni udio sticatelja licence na relevantnom tržištu proizvoda pribrajaju se podaci o vrijednosti prodatih proizvoda u koje je ugrađena **tehnologija sa licencom** i podaci o vrijednosti od prodaje njihovih zamjenskih proizvoda. Ako je davatelj licence u isto vrijeme i dobavljač proizvoda na relevantnom tržištu proizvoda tada se u tržišni udio davatelja licence pribraja i njegov tržišni udio na tom tržištu izračunat na osnovu podataka o vrijednosti prodatih proizvoda.

Član 6. **(Trajanje grupnog izuzeća)**

- (1) Grupno izuzeće za sporazume o prenosu tehnologije, pod uslovima utvrđenim u članu 4. stavova (1), (2) i (3) ove Odluke, primjenjivat će se za vrijeme trajanja prava intelektualnog vlasništva sadržanog u **tehnologiji sa licencom**, odnosno sve dok pravo intelektualnog vlasništva ne istekne, prestane ili ne bude proglašeno nevažećim. Grupno izuzeće za prenos *know-how* primjenjuje se za vrijeme dok je *know-how* tajan, osim ako kao posljedica aktivnosti sticatelja licence *know-how* postane javan, tada se grupno izuzeće primjenjuje za vrijeme trajanja sporazuma.
- (2) Ako ukupan tržišni udio strane u sporazumu koji su tržišni konkurenti na relevantnom tržištu u trenutku sklapanja sporazuma nije veći od dvadeset posto (20 %), a naknadno se poveća iznad tog iznosa, grupno izuzeće će se nastaviti primjenjivati tokom razdoblja od dvije uzastopne kalendarske godine koje slijede godinu u kojoj je prvi put povećan iznos ukupnog tržišnog udjela strane u sporazumu iznad dvadeset posto (20 %).
- (3) Ako tržišni udio svake strane u sporazumu koje nisu tržišni konkurenti na relevantnom tržištu u trenutku sklapanja sporazuma nije veći od trideset posto (30 %), a naknadno se poveća iznad tog iznosa, grupno izuzeće će se nastaviti primjenjivati tokom razdoblja od dvije uzastopne kalendarske godine koje slijede godinu u kojoj je prvi put povećan iznos tržišnog udjela strane u sporazumu iznad trideset posto (30 %).

III. OGRANIČENJA ODNOSNO USLOVI KOJE SPORAZUMI NE SMIJU SADRŽAVATI

Član 7.

(Teška ograničenja tržišne konkurencije u sporazumima između tržišnih konkurenata)

- (1) Grupno izuzeće ne može se primijeniti na sporazume sklopljene između tržišnih konkurenata koji neposredno ili posredno, samostalno ili zajedno s drugim članovima pod kontrolom strana u ugovoru, sadrže ograničenja koja imaju za cilj:
 - a) ograničavanje strane u ugovoru da slobodno određuje prodajnu cijenu proizvoda kada ih prodaje trećim stranama,
 - b) ograničavanje proizvodnje, izuzimajući ograničavanja proizvodnje proizvoda koji je predmet sporazuma, koje je nametnuto sticatelju licence neuzajamnim sporazumom, ili koje je nametnuto jednom od sticatelja licence uzajamnim sporazumom,
 - c) podjelu tržišta ili podjelu kupaca po grupama osim ograničenja iz stava (2) ovog člana,
 - d) ograničavanje prava sticatelja licence na iskorištavanje njegove tehnologije ili ograničavanje prava bilo koje strane u ugovoru na provođenje istraživanja i razvoja, osim ako je takvo ograničenje nepohodno za sprečavanje otkrivanja *know-how* sa licencom trećim stranama.
- (2) Podjela tržišta ili podjela kupaca po grupama iz stava (1) tačka c) ovog člana neće se smatrati teškim ograničenjem tržišne konkurencije u slučaju:
 - a) obaveze sticatelja licence da primjenom tehnologije sa licencom proizvodi samo unutar jednog ili više tehničkih polja primjene ili unutar jednog ili više tržišta proizvoda,
 - b) obaveze davatelja i/ili sticatelja licence utvrđene u neuzajamnom sporazumu da primjenom tehnologije sa licencom ne proizvodi unutar jednog ili više tehničkih polja primjene ili unutar jednog ili više tržišta proizvoda, ili unutar jednog ili više isključivih područja rezervisanih za drugu stranu u ugovoru,
 - c) obaveze davatelja licence da na određenom području ne ustupi licencu za navedenu tehnologiju drugom sticatelju licence,
 - d) ograničavanja u neuzajamnom sporazumu davatelju i/ili sticatelju licence, aktivne i/ili pasivne prodaje na isključivo dodjeljenom području ili isključivo dodjeljenoj grupi kupaca koja je rezervisana za drugu stranu u ugovoru,
 - e) ograničavanja u neuzajamnom sporazumu sticatelju licence aktivne prodaje na isključivo dodjeljenom području ili isključivo dodjeljenoj grupi kupaca koju je davatelj licence ustupio drugom sticatelju licence, pod uslovom da taj drugi sticatelj licence nije bio, u vrijeme sticanja svoje vlastite licence, privredni subjekat koji je tržišni konkurent davatelju licence na relevantnom tržištu,
 - f) obaveze sticatelja licence da proizvodi proizvod koji je predmet sporazuma isključivo za njegovu vlastitu upotrebu pod uslovom da se tom sticatelju licence ne ograničava aktivna i pasivna prodaja proizvoda koji je predmet sporazuma kao rezervnog dijela za njegove vlastite proizvode,
 - g) obaveze sticatelja licence iz neuzajamnog sporazuma da proizvodi proizvod koji je predmet sporazuma isključivo za određenog kupca, kada je licenca ustupljena s namjerom stvaranja alternativnog izvora nabavke za tog kupca.
- (3) Uzajamnim sporazumom, u smislu stava (1) tačka b) ovog člana, smatra se sporazum o prenosu tehnologije koji se temelji na uzajamnosti, u kome dva privredna subjekta, u istom ili u odvojenim ugovorima, ustupaju jedan drugome licencu za patent, licencu za *know-how*, licencu za autorsko pravo na računarskom programu ili kombinovanu licencu za patent, *know-how* ili autorsko pravo na računarskom programu i kada se te licence odnose na zamjenske tehnologije ili se mogu koristiti za proizvodnju zamjenskih proizvoda.
- (4) Neuzajamnim sporazumom, u smislu stava (1) tačka b) i stava (2) tačaka b), d), e) i g) ovog člana, smatra se sporazum o prenosu tehnologije koji se ne zasniva na uzajamnosti, u kome samo jedna ugovorna strana ustupa drugoj licencu za tehnologiju, te sporazum kojim dva privredna subjekta ustupaju jedan drugome licencu za patent, licencu za *know-how*, licencu za autorsko pravo na računarskom programu ili kombinovanu licencu za patent, *know-how* ili autorsko pravo na računarskom programu, pod uslovom da se te licence ne odnose na zamjenske tehnologije i ne mogu se koristiti za proizvodnju zamjenskih proizvoda.

- (5) Isključivo dodjeljeno područje, u smislu stava (2) tačaka b, d), i e) ovog člana, smatra se područje na kojem je samo jedan privredni subjekat ovlašten proizvoditi proizvod koji je predmet sporazuma upotrebom tehnologije sa licencom, ne isključujući mogućnost dopuštenja drugom sticatelju licence da unutar tog područja proizvodi proizvod koji je predmet sporazuma samo za određenog kupca, kada je ta druga licenca ustupljena s namjerom stvaranja alternativnog izvora nabavke za tog kupca.
- (6) Isključivo dodjeljena grupa kupaca u smislu stava (2) tačaka d), e) i g) ovog člana smatra se grupa kupaca kojima je samo jedan privredni subjekat ovlašten aktivno prodavati proizvod koji je predmet sporazuma, a proizveden je upotrebom tehnologije sa licencom.

Član 8.

(Teška ograničenja tržišne konkurencije u sporazumima između privrednih subjekata koji nisu tržišni konkurenti)

- (1) Grupno izuzeće ne može se primijeniti na sporazume sklopljene između privrednih subjekata koji nisu tržišni konkurenti koji neposredno ili posredno, samostalno ili zajedno s drugim učesnicima pod kontrolom strana u ugovoru, sadrže ograničenja koja imaju za cilj:
- a) ograničavanje prava strane u govoru da slobodno određuje prodajnu cijenu kod prodaje proizvoda trećim stranama, ne isključujući mogućnost nametanja najviše prodajne cijene ili preporučene prodajne cijene, pod uslovom da nije riječ o fiksnim ili minimalnim prodajnim cijenama, koje su rezultat izvršenog pritiska ili podsticanja od bilo koje strane u ugovoru .
 - b) ograničavanje područja ili ograničavanje kupaca kojima sticatelj licence pasivno može prodavati proizvod koji je predmet sporazuma osim ograničenja iz stava(2) ovog člana,
 - c) ograničavanje sticatelju licence, članu unutar sistema selektivne distribucije koji djeluje na nivou maloprodaje, aktivne ili pasivne prodaje krajnjim korisnicima, ne isključujući mogućnost zabrane djelovanja tom sticatelju licence izvan ovlaštenog poslovnog područja.
- (2) Ograničavanje područja ili ograničavanje kupaca kojima sticatelj licence pasivno može prodavati proizvod koji je predmet sporazuma iz stava (1) tačka b) ovog člana neće se smatrati teškim ograničenjem tržišne konkurencije u slučaju:
- a) ograničavanja sticatelju licence pasivne prodaje na isključivo dodjeljenom području ili isključivoj grupi kupaca rezervisanoj za davatelja licence,
 - b) ograničavanja sticatelju licence pasivne prodaje na isključivo dodjeljenom području ili isključivoj grupi kupaca koje je davatelj licence ustupio drugom sticatelju licence tokom prve dvije (2) godine u kojima taj drugi sticatelj licence prodaje proizvod koji je predmet sporazuma na tom području ili toj grupi kupaca,
 - c) obaveze sticatelja licence da proizvodi proizvod koji je predmet sporazuma isključivo za vlastitu upotrebu, pod uslovom da to sticatelja licence ne ograničava u aktivnoj i pasivnoj prodaji proizvoda koji je predmet sporazuma kao rezervnog dijela za njegove vlastite proizvode,
 - d) obaveze sticatelja licence da proizvodi proizvod koji je predmet sporazuma isključivo za određenog kupca, kada je licenca ustupljena s namjerom stvaranja alternativnog izvora nabavke za tog kupca,
 - e) ograničavanja sticatelju licence koji djeluje na nivou veleprodaje aktivne ili pasivne prodaje krajnjim korisnicima,
 - f) ograničavanja članovima unutar sistema selektivne distribucije aktivne ili pasivne prodaje neovlaštenim distributerima.
- (3) Ako su u vrijeme sklapanja sporazuma strane u ugovoru preduzetnici koji nisu tržišni konkurenti na relevantnom tržištu, ali naknadno postanu tržišni konkurenti na relevantnom tržištu, na njih će se primjenjivati odredbe stavova (1) i (2) ovog člana za vrijeme trajanja sporazuma, osim u slučaju da sporazum bude izmjenjen u bilo kojem bitnom dijelu.
- (4) Sistem selektivne distribucije, u smislu stava (1) tačka c) i stava (2) tačka f) ovog člana, je sistem distribucije u kojem se davatelj licence obavezuje da će licencu za proizvodnju proizvoda koji su predmet sporazuma ustupiti samo sticateljima licence izabranim na osnovu utvrđenih kriterija i u

kojem se sticatelji licence obavezuju da neće aktivno ili pasivno prodavati proizvode koji su predmet sporazuma neovlaštenim distributerima.

- (5) Aktivna prodaja, u smislu stava (1) tačka c) i stava (2) tačaka c), e) i f) ovog člana, podrazumijeva aktivno traženje i pristupanje kupcima ili određenoj grupi kupaca koji se nalaze na području rezervisanom za druge strane u sporazumu, sklapanje pojedinačnih ugovora te preduzimanje mjera za ponudu proizvoda tim kupcima, osnivanje podružnica, skladišta ili organizovanje distributivne mreže i promocije na tom području. Pod aktivnim pristupanjem smatra se i posjećivanje kupaca, slanje kupcima pošte što uključuje i elektronsku poštu, oglašavanje putem medija i drugih sredstava javnog informisanja namjenjenih isključivo za te kupce ili grupu kupaca koji se nalaze na području rezervisanom za druge strane u sporazumu.
- (6) Pasivna prodaja, u smislu stava (1) tačaka b) i c) i stavova (2) tačaka a), b), c), e) i f) ovog člana, podrazumijeva odgovaranje na zahtjeve pojedinačnih kupaca koji se nalaze na područjima rezervisanim za druge strane u sporazumu, uključujući isporuku proizvoda takvim kupcima, ali takvo odgovaranje ne smije biti posljedica djelovanja aktivne prodaje. Pod pasivnom prodajom smatra se i opšte reklamiranje ili oglašavanje u medijima ili na internetu koje dopire na područja rezervisana za druge strane u sporazumu, odnosno kupaca koji se nalaze na tim područjima, koje je rezultat razvoja tehnologije ili jednostavnosti pristupa, pa se smatra razumnim načinom pristupanja tim kupcima.

Član 9.

(Posebni uslovi koje sporazumi ne smiju sadržavati)

- (1) Grupno izuzeće ne može se primijeniti na sljedeće obaveze sadržane u sporazumima o prenosu tehnologije:
- a) neposredne ili posredne obaveze sticatelja licence da davatelju licence ili trećoj strani koju odredi davatelj licence ustupi isključivu licencu koja se odnosi na njegova vlastita dodatna poboljšanja ili na njegove vlastite nove aplikacije licencirane tehnologije,
 - b) neposredne ili posredne obaveze sticatelja licence da na davatelja licence ili trećoj strani koju odredi davatelj licence, u cijelosti ili djelomično, prenese prava koja se odnose na njegova vlastita dodatna poboljšanja ili na njegove vlastite nove aplikacije licencirane tehnologije,
 - c) neposredne ili posredne obaveze sticatelja licence da ne osporava valjanost prava intelektualnog vlasništva koja davatelj licence ima na relevantnom tržištu, ne isključujući mogućnost raskida ugovora o prenosu tehnologije u slučaju da sticatelj licence osporava valjanost jednog ili više licenciranih prava intelektualnog vlasništva.
- (2) U slučaju da strane u sporazumu nisu tržišni konkurenti na relevantnom tržištu, grupno izuzeće se neće primjenjivati na sporazume o prenosu tehnologije koji sadrže neposredne ili posredne obaveze kojima se ograničavaju prava sticatelja licence na iskorištavanje njegove vlastite tehnologije ili ograničavaju prava bilo koje strane u ugovoru na provođenje istraživanja i razvoja, osim ako je takvo ograničenje nepohodno za sprečavanje otkrivanja licenciranog *know-how* trećoj strani.
- (3) Dodatna poboljšanja iz stava (1) tačaka a) i b) ovog člana su ona poboljšanja koja se mogu koristiti, a da se time ne krše prava obuhvaćena licenciranom tehnologijom.

IV. UKIDANJE GRUPNOG IZUZEĆA I POJEDINAČNA IZUZEĆA

Član 10.

(Uslovi za ukidanje grupnog izuzeća)

- (1) Konkurencijsko vijeće može po službenoj dužnosti ili na zahtjev stranke, u smislu člana 7. stav (4) Zakona, pokrenuti postupak ocjene usklađenosti s odredbama člana 4. stav (3) Zakona i ovom Odlukom, pojedinog ili više sporazuma iz člana 2. ove Odluke, ako strane tog sporazuma, samostalno ili kumulativno sa sličnim sporazumima na relevantnom tržištu, ne ispunjavaju uslove za izuzeće.

- (2) Konkurencijsko vijeće može pokrenuti postupak ocjene sporazuma o prenosu tehnologije, u smislu stava (1) ovoga člana, posebno u slučajevima:
- kada je ograničen pristup relevantnom tržištu tehnologijama trećih strana zbog kumulativnog učinka paralelnih mreža sličnih ograničavajućih sporazuma kojima se sticateljima licence zabranjuje upotreba tehnologije trećih strana,
 - kada je ograničen pristup relevantnom tržištu potencijalnim sticateljima licence zbog kumulativnog učinka paralelnih mreža sličnih ograničavajućih sporazuma kojima se davateljima licence zabranjuje ustupanje licence drugim sticateljima licence,
 - kada bez objektivno valjanog razloga strane u sporazumu ne koriste tehnologiju **sa licencom**.
- (3) Ako Konkurencijsko vijeće pri ocjeni usklađenosti sporazuma s odredbama Zakona i ovom Odlukom, utvrdi da ne postoje razlozi za izuzeće sporazuma, rješenjem će ukinuti primjenu grupnog izuzeća za taj sporazum.

Član 11.
(Pojedinačno izuzeće)

Učesnici u sporazumu mogu podnijeti Konkurencijskom vijeću zahtjev za pojedinačnim izuzećem sporazuma, u skladu s članom 5. Zakona, ako taj sporazum nije obuhvaćen grupnim izuzećem u smislu člana 3. ove Odluke.

Član 12.
(Isključenje obaveze prijave za strane u sporazumu)

Strane u sporazumu o prenosu tehnologije koji ispunjavaju uslove za grupno izuzeće iz ove Odluke, u smislu člana 7. stav (3) Zakona, nisu u obavezi podnijeti takve sporazume na ocjenu Konkurencijskom vijeću radi pojedinačnog izuzeća.

V. PRELAZNE I ZAVRŠNE ODREDBE

Član 13.

- Sporazumi o prenosu tehnologije iz člana 2. ove Odluke sklopljeni do stupanja na snagu ove Odluke moraju biti usklađeni s njenim odredbama do 31. decembra 2006. godine.
- Za sporazume o prenosu tehnologije sklopljene do stupanja na snagu ove Odluke, pod uslovom da su usklađeni s njenim odredbama u roku iz stava (1) ovog člana, tržišni se udio, izuzimajući član 5. stav (2) ove Odluke, izračunava na osnovu podataka koji se odnose na kalendarsku godinu koja prethodi godini stupanja na snagu ove Odluke.

Član 14.
(Stupanje na snagu)

Ova Odluka stupa na snagu osmog dana od dana objavljivanja u »Službenom glasniku Bosne i Hercegovine«, a objavit će se i u službenim glasilima entiteta i Brčko Distrikta Bosne i Hercegovine.

K.V. broj: 01-01-26-628/05

Sarajevo, 30. decembar 2005. godine

Predsjednica
Konkurencijskog vijeća

Sena Hatibović